

La goule-és-féys

Vouéz off : La mere Miliy taet saïje-fame de metier. 'la taet le sair, e come tout les sairs, o taet ao coin de son fouyer. A-coup, qheug'un cognit a l'us de s'n ôtë - Dao, dao dao !

Miliy : Qhi q'êt don a l'ouere-la ? (O debare s'n us e vaye su son sieudu eune vaille fame. O la prie a rentrer.

Miliy : Rentréz va, l'ôtë va point vous pâsser ao qheû !

La vaille fame : Hate tai cante mai, faraet qe je vont tout contr Saint-Leunére a cete fin d'assister eune créyature q'êt en ma d'éfant

Miliy : Parai dame ! Meins esperéz un p'tit, je vas mettr mes solérs den mes piës (o met ses solérs den ses piës), je vas mettr su mon dôs eune p'tite devantiere raport a la fré (o met eune p'tite devantiere su son dôs), je vas qhuter mon feu (o qhute son feu) e me v'la paréy a te sieudr !

Vouéz off : Le coupl de fames s'entr-sienvite par les sentes. Biao qe 'la fût la net, ét la vaille fame qi menaet e o marchaet, yelle, come si q'ole araet marchë de vûe de jou.

N-i avaet mézë un p'tit de temp q'i taen parties cant qe la Miliy oui le brut de la mè, qi menaet tenant de ramaïje contr les rôches des falâzes (Brut de la mé)

Miliy : Eyou q'ous me menéz ? Voul'ous me fere aler diq'a la Goule-és-Féys, ousqe n'en dit q'en vaye des fions d'aotr-fai ?

La vaille fame : Vére Miliy, j'alons dret la ! Prends ma main, tu n'as qe fere d'avaïr pou, je vieus point te défalâzer. Sieus mai e tu renras service a yeune de tes semblabls.

Vouéz off : La Miliy-la araet ben v'lu étr core céz yelle ao coin de son fouyer, ou ben den son let dame e o taet q'o marchaet su les pentières des falâzes come su eune route messière. I finire par ariver a la Goule-és- Féys q'êt eune grotte escarabl câziment aossi grande come yelle a Pouliféy ou la Salle a Margot qe les monsieûs vont vair cant le temp ét biao et q'i sont ao bâs des falâzes de Ferhel. Eune ome la z'acouillit

L'ome : Hâte tai don, la fame en ma d'éfant ét la, den la chambr d'a côté. Ole ét a ma, faraet qe tu fes entour de yelle

(Miliy pâsse eune us. Nen ouaye un p'tit de brut e o s'en revient qheuques segondes après o un poupon a bra. Des fames e des omes s'agreuent a ergarder le poupon e a bayer du bè pa'la. Eune fame bâille eune bouéte a Miliy)

Fame a la bouéte : Le baome-la ét parai come de la grésse de pouère, respet de vous**, meins 'la n-n'è point. Faot froter l'éfant otout e deça ét de ben s'essuer les mains ou ben q'i va t'arivaet ventiéy du deu !

Vouéz Off : Miliy frotit la garçaille. Frote qi n'frote. Meins dame, la v'la qe de sa grater un zieu e o se mit un p'tit de baome den un coin. A coup tout chanje entour de yelle

Miliy : Oh maoçion ! La grotte-la ét belle come un eglize a la mi-oût. Les fames sont hanéys come des princeresses ! Je n'è mai pas jameins vû de cai si bao ! Né céz les bourjoués a Saint-Mâlo, né den les châtaos de Proubala, de Plleurtu ou de Saint-Béria.

(Su les châfaos, des p'tits fions sont a danser hanës come des signous o des épéys ao cotë)

Vouéz off : Miliy taet ebaobiy net meins o ne dit moute e repaïsse a froter l'éfant

(Miliy frote l'éfant)

Un fion : Bon de même mézë, t'es qhite d'o t'n ouvraiïje. Vaila eune boune bourséy d'arjient, j'alons te

ramener céz tai.

Vouéz Off : Depés le temp-la, la Miliy vayaet des fions de toutes les menieres par les sentes e par les clôz. Un jou, eune amin a yelle vint la vaïre...

Amin a la Miliy : Miliy, Miliy, hâte tai cante mai, j'alons aler a la faire de Saint-Béria eyou qe les touchous de Tréméreu e de Peudeuneu viennent vendr lous pouéres e lous nouretures

Miliy : Parai, marchons don !

(Faïre de Saint-Béria, des omes e des fames sont a demener des etas, a vendr des pouéres, de la vivature)

Vouéz off : Miliy e s'n amin taen a se pourmener a la faire. E o veyat du cai de drôle. Sa sonjéy li chayit den la goule de même :

Miliy : Saperbouéz, n-i a des féys e des fions un p'tit partout e les siens-la sont a tiendr des p'tits jeûs e a bezer le paovr monde. Il lou volent sa paovr arjient seben

(A-coup, Miliy vaye eune féy qi met sa main den la pochette de la devantiere d'eune chupéy)

Miliy : La volouére, la voulouére !

La souguernouére ! La souguernouére !

(Miliy ét de perfil en-vu les regardous. La féy se tourne devers yelle e li tire un zieu)

La féy volouze : Avize saprè huchouere ! Ton zieu ét a mai, te v'la borgnesse mézè !

(E la Miliy qe de se tourner devers les regardous o un zieu fromë. O taet borgnesse !)

Vouéz off : V'la coment q'la se tourne cant q'en acoute point les dirijements és féys -a maïtië sorcieres seben- ou ben... de son monde !